



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Afghan tensa nung ajemdaker asalentong yanglutsü: Rajnath

Ashraf Ghani-i aibelen ka menaogo: Suhail Shaheen



VOL. XVIII NO. 317 (ADOK 317) DIMAPUR

TENTONÜ (MONDAY)

LUROI (AUGUST) 30, 2021

₹ 5.00

COVID-19 Nagaland: 64 taneptsü angu, 52 dak putet & 3 asü

Kohima, August 29, 2021 (TYO): Deobarnü Nagaland nung COVID-19 agi shiranger nisung 64 taneptsü angu aser 52 dak putet.

"Tesüiba ghonda 24 tsüingda COVID-19 puteta alir nisung 64 taneptsü angu. Parnokji Dimapur nung 41, Mokokchung nung 13 aser Kohima nung 10 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur ajak agi nisung 27,665 kümogo aser ibaji 92.30% lir, ta paisa ashi.

"Deobarnü nisung 52 dak COVID-19 aliba putet. Parnokji Dimapur nung 16, Kohima nung 15, Mon nung 7, Phek nung 5, Zunheboto nung 4, Mokokchung nung 3 aser Wokha nung 2 lir. Tang COVID-19 puteta anepalur nisung 806 lir" ta paisa metetdaksü.

Deobarnü Kohima nung COVID-19 puteta alir nisung 3 asüba züingsema tasür ajak agi

617 kümogo, ta Dr. Kikon-isa ashi.

"Tang tashi nung COVID-19 alitsü akok ta temolung melemi bilemba sample 317,394 tendangogo. RT-PCR ajanga 106,157, TrueNat ajanga 75,504 aser Rapid Antigen Test ajanga 135,733 tendang" Dr Kikon-isa metetdaksü.

"Honibar tashi nung nisung 654,789 nem COVID-19 vaccine indang dose 850,419 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,848, healthcare workers 15,990, arishi küm 45 ser tempur 192,482 aser arishi küm 18 nungi 44 tsüingda alir 385,469 lir" ta paisa ashi.

"Vaccine agirtem rongnungi nisung 195,630-i dose anaprong agiogo. Parnokji frontline workers 43,030, healthcare workers 12,904, arishi küm 45 ser tempur 113,742 aser arishi küm 18 nungi 44 tsüingda alir 24,954 lir" ta Dr Thurr-isa metetdaksü.

Naga tsürtemi India sepai nem rakhi mesüloksüba aitsür: NMA

Dimapur, August 29, 2021 (TYO): Tawa Naga tsür kari Raksha Bandhan tenüing nung Indian armed forces nem rakhi mesüloksüba inyakyim khukhua aitsür ta Naga Mothers' Association (NMA)-i metetdaksüogo.

NMA-i BJP Mahila Morcha national secretary Aienla Jamir aser Dimapur District Mahila Morcha president Avi Aomi nati anir züingsemtem aser kaketshir telok den Tamenglong nung tetsürtem dang ashishitep aketba sentongtem nung shilem agütsü melena Naga tsürtem den longjemtsü tayongzükba agütsüogo.

"Nenok ya chichiba Naga nung sūra aser Naga nung meimertem sūra, India sorkar aser Central BJP lennirtem dang AFSPA agientsü aser Assam Rifles dena Indian armed forces-i tashiyim mapatem inyakba atema temeten agüjang ta ola adoktsüla" ta NMA-isa metetdaksü.

Armed Forces Special Powers Act (AFSPA) kübok Indian armed forces-i Naga nung reshikangshia arur. Taoba mapang India sepaitemi Naga tsürtem dak tashiyim agi shi nung medemba, tim mesüi kongshiba aser tashiyim mapa inyakba den ano yimtsüingtem ka kuma lokteper lidaktsüba aser reshikangshiba inyakyimtem mamateti aliba mapang ka nung Naga tsür kari item sepai nem rakhi mesüloksüba maaksü lir" ta

NMA-i sangdong ka nung ashi.

Naga nung aliba tesemtem nung nübor AFSPA kübok ali tashi ibala inyakyim magizüker. India sepaitemi meimchir temeten alema inyakba atema temeten mengui bushitepa aruba mapang ka nung Naga tsürtemi sepaitem nem tetushi agütsüba magizüker. Küm aika tejakdang India sepai ket nungi takoksa ajuruba kibongtemi temeten meshia ola adokba manen lir aser parnok nem temeten ano magütsü lir" ta NMA-isa metetdaksü.

1960 küm September 6 nü 16th Punjab Regiment-i Matikhru nung Naga nung tepsetbaji Black Day lir aser tanü tashi iba anogo nung meimchir temeten alema inyakba bilemteta amonger. Maneni, India sepaitemi Oinam aser temeket yimtsüingtem nung, Mokokchung, Pangsha aser Wuzu nung tashiyim mapa inyakbatem mama lir aser takoksa ajuruba kibongtem den külemi mangyimer

Talisa, Naga tsürtemi 44 Assam Rifles, Tamenglong ajanga sangdong agütsüba magizüker, kechiyong parnoki tashiyim mapa inyakba reprangra sayutsüingi jenjang ka nung mali, ta NMA-isa ashi.

Raksha Bandhan anema noktakba ya sobaliba mesüra tamangba yimsü meputepba atema masü saka AFSPA kübok tetsür aser tanurtem dena Naga nung alema mapa inyakba atema temeten magütsüba indang lir, ta NMA-isa metetdaksü.

Kabul airport anasa nisung 6 pokset; US-i drone amshia 'suicide bombers' amak



Deobarnü Kabul nung aliba Hamid Karzai International Airport anasa bomb tesashi ka apokba lendong nung yirurtem mozü ki bushia aoba yangi noksa nung angur.

New Delhi, August 29, 2021 (Agencies): Anogo asem tejakdang ISIS-Khorasan-i bomb aika pokdaksüba sülen Deobarnü Kabul nung aliba Hamid Karzai International Airport anasa bomb tesashi ka apok.

Deobar anüingdang tayimtsü anendak anasa aliba Gulai tesem nung rocket jagi ki ka poksatsü, ta Kabul police ketdangsur Rashid-i ashi.

Iba lendong nung tanur ka dena nisung trok tashi pokset aser kar yiru, ta The Afghanistan Times-ia metetdaksüogo.

Iba tatalokba atema telok shingaiya tenüing agiba osang mali.

Külen, United States-ia Deobarnü Kabul nung ISIS-K telungpurtem ta temolung melemi bilemertem dak drone amshia amak.

"Tensa lendong ajurutsüsa lir aser kiralongrartemi airport amaktsü. Ozü commander temi

"Gari ka nung 'suicide bombers' aika mener Kabul airport-i aruya lia drone amshia parnok amak" ta US Central Command spokesman Bill Urban-ia ashi.

"Drone amshia gari amakba sülen gari nung tapoktsü aika apok aser iba ajanga 'explosive material' bena aliba kuli agütsüogo" ta Bill Urban-ia ashi.

Deobarnü US air strike ka ajanga Kabul airport amaktsü aruba suicide bomber ka amak, ta Taliban-ia shiogo.

Taruba ghonda 24 nungi 36 tsüingda kiralongrartemi Kabul airport amaktsü akok ta US President Joe Biden-i ashiba sülen ghonda ishika dang lir rocket amshia amak.

"Tensa lendong ajurutsüsa lir aser kiralongrartemi airport amaktsü. Ozü commander temi

taruba ghonda 24-36 tsüingda amaktsü akok ta kü dang shiogo" ta Joe Biden-i metetdaksü.

Iba osang sülen US State Department-i Kabul airport aser temeket nung aliba America nung ajaki tesem toktsür aotsü osang metetdakja liasü.

Kabul nung US evacuation mission ya August 31, 2021 tashi dang lir.

Külen, Britain-i Afghanistan nung diplomatic mission anenogo. Honibarnü Kabul nungi Britain nung 2000 tema amenba tayimtsü tatemsabuba apusoa ogo, ta TOLO news agency-i metetdaksü.

Taliban-i Kabul atsüing agiba aser August 15 nü taoba Afghanistan president Ashraf Ghani-i linük toktsür jena aoba sülen bendangertemi Afghanistan toktsür aotsü tenzüka liasü.

Nagaland SDG Vision 2030: Yimti aser jilatem tajungba akümstsü ULBs election magiba ajanga ketdangsubaren nung tetsükdaksü ajurur

Kohima, August 29, 2021 (TYO): Nagaland state nütsüing yongsük nungi 71.14% tashi jila nungi pilar yimtsüingtem aser tanga tesemtem nung alir aser iba jagi sorkari parnok nem basic services tajungba agütsütsü nükjidong lir.

Iba ya Chief Minister Neiphiu Rio-i tawa sayaba Nagaland SDG Vision 2030 nung shia lir.

2011 Census ajanga linük nung nisung renlokbaji 21% lir saka Nagaland nungbo 69% ta shia lir.

Nagaland nung nisung kanga renloka aobaji state ajungalen masü saka Kohima aser Dimapur nung teimba lir, ta Vision Document nung ashi.

Jilatem nung alir teimba ka lanurtem lir aser parnoki mapa inyaktsü aser taküm liyonga aotsü atema lenmang sadema mangur. Maneni, jilatem nung tang nüngdakbatemperia mangur aser item rongnung housing aser rongsenketzüng maparen lir. Iba ama tensa ka nung urban poverty tibilemstsü ajurur, ta Document

nungsa shia lir.

Nagaland nung ali kibur inyakyim balaka amshibayong, terenlok mapa inyaktsü atema ali sadema mangur aser iba ya tayongzükba tuluba lir. Iba tibilemstsü ajanga mapatong aika inyaktsü tsükdaker aser ali ken o ajanga mapa aika meinyakteter.

Ali ken o tem aliba ajanga master plans aser development plans mapa kuma meinyakteter, ta Vision Document nungsa shia lir.

Nagaland nung yimtsüingtem nungbo ketdangsubaren kanga junga lir saka Urban Local Bodies (ULBs)-ibo iba mapa meinyaketer. Nagaland nung Municipal Council 3 aser Town Council 36 lir aser ULBs indang mezüing election ji 2004 nung agia liasü saka iba sülen tetsür nem shilem 33 lemzüksütsüba onük ajanga election magiteti arur aser iba ajanga urban governance system nung tetsükdaksü tulu ajurur, ta Vision Document nungsa shia lir.

Iba tibilemstsü atema state sorkari 2030 küm tashi nung

yimti aser jilatem tajungba kümdaktsütsü sentong renemogo. Sorkari gari lenmang tasentem aser administrative headquarters yanglutsü mesüra mapa tasen kar inyaktsü, ta document nungsa shia lir.

Ajisüaka, ozüing melaba ama ketdangsurtem meshimra ULBs nem tashi magütsüteter anungji tekaratiba nung Municipal election agütsüla, ta Vision Document nungsa shia lir.

Neiphiu Rio-i aniba sorkari 2030 küm matongdang state ajungalen Economically Weaker Sections (EWS) households alitsü atema kiojen 35,000 tashi yanglutsü sentong lir.

State sorkarisa ULBs ajak nung septage aser waste management yanglutsü tibilemba lir. Sorkarisa toilet coverage & adequate public mesüra community toilets 100% aser mozü kitem nung bio-medical waste segregation 100 % yanglutsü sentong renemogo, ta Nagaland SDG Vision 2030 nungsa shia lir.

Indian Army-i NCC Cadets atema sentong ka ayongzük



Dimapur, Luroi/August 29 (TYO): Dimapur nung aliba School aser College balala aser lanurtem aser kinungertem asoshi Indian Army ajanga mitkartem indang hadir aser pipe band sayuba sentong ka Rangapahar Military Station, Dimapur nung August 28, 2021 nü Swarnim Vijay Varsh benongmung nung shilem ka ama ayongzükka agia liasü.

Iba saya ya Spear Corps ajanga ayongzük aser yangji NCC Cadest 200 shi dena liasü. Iba sentong nung nok-o-nü sayauba, hadir balala sayuba aser Army pipe band ajanga shilem agi aser tesemdang den sensaksem aliba mapang Indian Army indang tashi tali tejangjaba meteta liasü. NCC Cadet tem yagi mitkar lenirtem den sensaksema army

nung adentsü asoshi lenmangtem lemsatepa liasü. Military band ajanga nisung atsür arutsüsa martial tunes atemba ajanga tesemdang molungjang nung linük meimba molungsentsü aitdaksü. Ajidang masü, lanurtemi Indian Army indang tali metetnüa tejangraba tulu nung iba sentong nung shilem agia liasü.

Arishi küm 5 tanur Mizo tsür kati nübur molung atsür arur



Esther Hnmate

Dimapur, Luroi/August 29 (TYO): Mizoram nungi arishi küm pongu tetsürchanu kati Army i n d a n g uniform semer national anthem atenba ajanga ajak

molung atsür arur. Lai ket atenba video ya social media tasüng prokshia lir. Kanga temeimtsü keta aliba tetsürchanulai national anthem ya 3 Assam Rifles den Lunglei, Mizoram nung aten, koba lar ki aliba jila lir. Minute ana jungnüa aliba video ya Air Marshal Anil Chopra (Retired) ajanga Twitter nung lemsatepa liasü.

"Mizoram nungi Esther Hnmate ta sür arishi küm pongu tetsürchanu kati National Anthem atenba Indian Army-i angashi. Parnoki la bushi aser army band den National Anthem ya record asü. Kota jangratemtsü," ta pai zülutsü. Social media nung nüburtemi Esther aser iba video tenüng asanger.

Assam Rifles ajanga sentong balala ayongzükka agi



Dimapur, Luroi/August 29 (TYO): HQ IGAR (North) kübok Assam Rifles temi state kübok tesem balala nung nüburtem ajangzüksü asoshi sentong balala ayongzükka agia liasü.

Assam Rifles ajanga coaching agütsüba aser lenmang sayuba aser ano takok tajung ngutetba asoshi ajungshiba ngua Nokyan nung alirtemi Assam Rifles dang pelaba lemsatepa liasü.

mapang face mask amshitsü aser tashidak nungi jenbua alitsü mera balala agitsü indang yimyatem sayua liasü. **TUENSANG :** HQ IGAR (N) kübok Assam Rifles, Shamatore Battalion ajanga August 29, 2021 nü Tuensang district kübok meta talang nung aliba Waphar yimtsüng nung angati medical camp ka ayongzükka katsü.

MON : Mon district kübok tesem tezülen Nokyan yimtsüng nung aliba Assam Rifles temi Sainik School Punglwa nung entrance atema iba yimtsüng nungi Mihlei Konyak'er jabaso M Holem Konyak nem coaching agüja lenmang balala sayua liasü.

PHEK : HQ IGAR (North) kübok Assam Rifles, Kiphire Battalion ajanga Phek district kübok Akhegwo yimtsüng nung August 29, 2021 nü medical camp ya ayongzükka liasü. Akhegwo yimtsüng nung aliba nüburtem nem medical teyari agütsütsü asoshi iba medical camp ya ayongzükka liasü. State kübok meta talang nung aliba nüburtem nem akok tashi teyari agütsüba maparen nung iba ya ka liasü.

Yimtsüng nung scrub typhus, temang metaba amala tashidak kanga sashia prokshia aoba mechi Waphar yimtsüng nung alirtemi taoba mapang Assam Rifles tem dang Medical Camp ka ayongzükka kajang ta asüngdanga liasü. Nüburtemi asüngdanga ama angati medical camp ya Deobarnü ayongzükka liasü, kechiaser iba anogo nüburtem awashi mesü aki-alui maor.

Pai bendanga agütsür meranga azüngba ajanga Class VI atema entrance exam ajangtet. Pa ajungmesotsü nükjidong nung Nokyan Post ajanga M Holem Konyak nem tenüngsang agütsüba sentong ka August 29, 2021 nü ayongzükka agia liasü. Iba sentong nung pa ajungmesoa Samsung Tab ka, school len amshitsü yangkhu ka aser academic session atema stationary oset kar agüja liasü.

Assam Rifles ajanga iba yimtsüng nung medical teyari agütsüba mapang nisung 65 anepalua tajangzük ngua liasü. Iba sentong nung Assam Rifles temi yimdakilir dang temang mürekmejua alitsü aser COVID-19 mozü agiba

Iba camp nung tetsür, tanur aser teintet rogotem densema nisung 130 temang repranga angati mozü agüja liasü.

Governor-i Janmashtami benjong salem lemsatep

Dimapur, Luroi/August 29 (TYO): Nagaland nung aliba nüburtem dangi Janmashtami benjong salem abener, ta Nagaland Governor, R. N. Ravi ajanga sangdong ka nung ashi. Janmashtami ya Lord Krishna asoba, pa takum aser pa tesayuba benjongba lir aser ibai linük tesem ajungalen akhi yimsü nung tejangraba tulu nung amunger.

tamendak dak tashi itshiti, ta Governor-i ashi. Iba benjong indang sangdong, temeim, aria bilem aser dangar atema bilemja tenzükba asen dak lidakja asen linük tejakleni anir oti, ta pai ashi. Iba benjongmung mapang ajaki COVID-19 tashidak nungi kumzükka alitsü meratem agitsü ajungshir. Iba anogomung nung ni Nagaland nung aliba nüburtem takum tajung, tepela aser yimchiyimjung lidakjang ta moatsür, ta R. N. Ravi-isa ashi.

Pai ochi yimya amshitsü aser inyaksü sayuba ajanga asenok ajak ajungmesoa asen lokti

Rengma & Zeliangrong Council, Assam ajanga NHnungitsü ayongzük

Kohima, Luroi/August 29 (TYO): Assam nung aliba Rengma aser Zeliangrong nüburtemi arütsü alema orr aliba Naga nung dang lungjemer Naga Hoho nungita tashi itshidaksütsü ayongzükka liasü.

ajanga Naga Hoho-i ken o balala nung shilem agia arur. April 18, 2009 nü Deputy Speaker, H.K. Zhimomi-i anir Naga Hoho ketdangsürtemi Haflong N.C. Hills semdanga liasü. Iba mapang Dimasas (Kacharis) aser Zeme Naga tsüntaga mangatetep adoka liasü, ta ashi.

Assam, Manipur, Nagaland, Arunachal aser Burma nung nisungi yangluba arütsü liaka kin ajanga lenirtemi maneni Naga Hoho den nokdaksü aser nungitsü ajungshi.

Iba mapang Naha Hoho-i senotsü, rongsen aser shisatsü agi yaria liasü. Iba dak sendakba ken o nung Zeliangrong Baudi ajanga N.C. Hills nung yimjung tanaben lidaksütsü atema June 29, 2009 nü Dimapur yimti nung rally ka ayongzükka liasü, kong Naga Hoho-ia shilem agia N.C. Hills nung aliba Naga nung takum kumzükka ayutsü atema India Ato Kilonser dangi tezüluba ka yoka liasü.

Rengma and Zeliangrong Council, Assam ajanga sangdong ka nung ashiba agi, kati ka asoshi aria bilemja inyaksü, Naga nung kibong tanaben yanglushitsü aser Naga System wazükka yua sobaliba aser yimtenren temaba jenjangi ajungkettsü nükjidong nung Naga Hoho ya Naga nungeri March 11 aser 12, 1998 nung Zunheboto nung tenzükka liasü.

Ano 2014 küm Karbi Anglong nung kin balala tsüntaga mepetmesü adoka liasü, aser iba mapanggia Naga Hoho-i tongti shilem agia district nung yimjung tanaben lidaksü, ta ashi.

Naga nung telok balala tsüntaga rara adoka aliba tensa azüoktsü aser angateteptsü atema Naga Hoho-i tongtipang shilem agia lir. State balala tsüntaga nisungi yangluba arütsü liaka tebandang makai Naga Hoho-i Naga nung kin 39 lungjemdaksütsü asoshi maparen anir tenzük. Indo-Naga yimten ken o jembishinüba nung Naga Hoho-i shilem agiba atema temolung süa agizükker aser iba tangatetep ken o nung Naga nung aliba tesem ajanga adentsü amanger, ta sangdong ajanga ashi.

Anungji onoki Naga Hoho dang kanga pelar. "Nagaland telungzük aser tezülen Naga nung aliba tesem ajanga nung yakyaka inyaksangshiba lokti tentet tuluji Naga Hoho ya dang ta Assam nung aliba Naga nungertemi amanger," ta sangdong ajanga ashi. Anungji nüburtem mangmangtsüsa aser tang aliba Naga Hoho den lenmang balala nung jajatsüsa lokti tentet kecha menungitsü, ta Assam nung aliba Rengma aser Zeliangrong council ajangasa ashi.

Region aser state arütsü mebandangi kin balala nungi lokti tentet teyari aser tashi

Fit India Movement kübok Manipur nung Freedom Cycle Rally aka

Kohima, Luroi/August 29 (TYO): Fit India Movement temaba jenjangi ajungkettsü aser Azadika Amrit Mahotsav benjongka Chandel aser MAAMBA Cycling Clubs den lungjemer Spear Corps kübok Assam Rifles, Chandel Battalion ajanga August 28, 2021 nü Freedom Cycle Rally ka ayongzükka liasü.

cycle club tem nung züngsemtem civilian 70 dena cyclist 90-i shilem agia liasü. Cyclist temi tongtipang aser tejangja tesemtem ajanga oa yimtsüngtem nung anen aser India nung nujiso anguba aser Fit India Movement indang osang prokshia liasü.

Iba cycle rally ya Mantripukhri garrison nungi tenzük aser kilometer 100 ayimjema Mantripukhri - Nambol - Bishnupur lenmang nung jajar Bishnupur district kübok Moirang nung aliba INA Museum nung tembanga liasü. Iba sentong nung yangji aliba

Iba sentong tenzükdang Assam Rifles Pipe Band ajanga shilem agi aser India nunger football asayar Bala Devi nem tenüngsang aser tetushi agüja liasü. Assam Rifles ajanga iba ama sentong tajung ayongzükba atema Chandel aser MAAMBA cycle club-i pelaba lemsatepa liasü.

Manipur nung AR-i PREPAK telungpur ka apu



Imphal, August 29, 2021 (Agencies): Manipur kübok Thoubal district nung Assam Rifles-i People's Revolutionary Party of Kangleipak (PREPAK) züngsem ka apu. Iba mapang pa ket nungi pistol ka den injangtem ngutet.

Manipur police den Keithelmanbi Battalion, Assam Rifles longjemer mita aoba mapang telungpurji apu.

Thoubal district kübok Yairipok yimsüing mita aoba mapang sepaitemi PREPAK telungpur apuba den külemi pa ket nungi 9 mm pistol ka aser magazine den injang pungo

ngutet. "August 27, 2021 nü Keithelmanbi Battalion Assam Rifles den police longjemer Yairipok Village, Thoubal District mita aoba mapang PREPAK indang telungpur ka apu aser pa ket nungi 9 mm pistol ka den magazine aser injang pungo ngutet," ta Assam Rifles-i Twitter nung ashi.

August 26, 2021 nü Keithelmanbi aser Mantripukhri Battalion Assam Rifles team-i Imphal West district nung tesem ana lemsar mita aoba mapang PREPAK aser UNLF telungpur ana apu, ta parnokisa

metetdaksü. Iba ya matalokdang, July 12, 2021 nunga Assam Rifles-isa Manipur kübok tesem ana mitba mapang People's Revolutionary Party of Kangleipak (PREPAK) aser People's Liberation of Army (PLA) indang telungpur ana pua liasü.

Manipur nung PREPAK aser PLA telungpur tentet anaprongla ozüingi noktanga lir.

IGAR (South) kübok Keithelmanbi aser Chassad Battalion Assam Rifles team-i Imphal West aser Kamjong district nungi telungpur anaprongla pua liasü.

Goalpara nung police-i nisung ana khaset

Goalpara, August 29, 2021 (Agencies): Assam kübok Goalpara nung police-i nisung ana khaset aser ka apu.

Deobarnü Assam director general of police (DGP) - Bhaskar Jyoti Mahanta-i iba tatalokba osang jangjatsüogo.

"Yashi Goalpara nung iba lendong atalok Police station pezü shi adena Police-i ozüing alema inyakertem arrüa aotsüsa aküm. Idangji parnoki police dak injang khaloktsü. Ajisüaka police-i tensa azüoktet" ta Assam DGP-i ashi.

Police aser ozüing alema inyakertem tsüingda khatepba lendong nung Rafajuddin aser Basit Ali ta khaset ta jangaogo. Police-isa Rashidul

Islam ta ser nisung ka pua lir. Telok ana tsüingda khatepba mapang Rashidul Islam injang agi yiru aser pa mozüki ka nung anepaludar.

Iba lendong nung parnok rongnung jena aoe ka aputsü asoshi police-i bushidar.

"Police aser ozüing alema inyakertem tsüingda khatepba mapang, nisung ana (Rafajuddin & Basit Ali) asü aser Rashidul Islam injang agi yirua liasü. Parnok rongnung nisung pezübuba aputsü asoshi onoki bushidar. Taoba nunga parnok anema mapa tamajung inyakba ken o benoka lir. Parnok mener aoba gari aser prangbong ka ngutet," ta Assam DGP Bhaskar Jyoti Mahanta-i metetdaksü.

Arunachal: FMD tashidak ajanga sü 800 dak tema asü

Itanagar, August 29, 2021 (Agencies): Kanga dang sashia menatepa aoba tashidak Food-and-Mouth disease (FMD) ajanga Arunachal Pradesh nung kiset shiruru meyrirjang aika dak kongshiogo.

FMD dang "kiset shiruru samatsüba tashidak" ta ajar aser iba tashidak ajanga Arunachal Pradesh nung sü 808 aser nashi 71 süogo.

"Taoba mapang iba tashidak agi sü 11,398 aser nashi 2914

dak kongshiogo" ta Arunachal Pradesh Veterinary & Animal Husbandry Minister, Tage Taki-i ashi.

"Arunachal Pradesh nung FMD ya shiruru dak kanga bulua aliba tashidak ka kümogo. Kidang metsüba kiset shiruru atema iba tashidak (FMD) ya lendong tuluka kümogo. FMD tashidak yagi mamatzü agütsüba shiruru aser alu alaba shiruru dak kongshir," ta Taki-isa ashi. Foot-and-Mouth tashidak ya

menateper aser khen khenbo mazüoktetsüsa kanga bulua proker; aser iba tashidak yagi kiset shiruru densema temesüla aketba shiruru (cloven-hoofed) aser temesüla aketba arem shiruru dak kongshir.

Iba virus ajanga anogo ana nungi trok tashi temang meta shirangdaksür. Iba sülen, tebang telung aser tetsüing nung tzü banga wakdaksür (blister), koba pokmatsü akok aser tetsüing tatsük kumdaksür.

Mizoram nung Rs 1.31 crores alangba foreign cigarettes apu



Aizawl, August 29, 2021 (Agencies): Mizoram kübok Champhai district nung Assam Rifles sepaitemi foreign cigarettes aika puogo.

AR sepaitemi apuba foreign cigarettes ji Rs 1.31 crores indang liasü.

"Osang tejangka ka angazükba sülen Assam Rifles aser Customs department Champhai külem telok kati iba mapa inyak" ta Assam Rifles-i

Champhai district kübok Maulkawi-Hruaikwn anasa foreign cigarettes cases 100 aser loose packets 45 apu, ta parnoki metetdaksü.

Iba dak sendakba nung nisung ka puogo.

Mizoram nung India-Myanmar arrtsülen ozüing alema shibelenba maparen ka tebilemtsü tulu ka lir, ta Assam Rifles-isa metetdaksü.

Guwahati nung Rs 7 crore alang heroin apu

Guwahati, August 29, 2021 (Agencies): Honibar aonung tesü Assam Police-i drugs mafia nisung 6 apu aser parnok ket nungi mozü aika ngutetogo.

Guwahati kübok Sonapur tesem nung police-i heroin seret 1.2 apu. Iba ya Tata Bolero ka nung bena lia angu. Sonapur Toll Gate anasa

police-i ozüing alema shibelenba mozüji apu.

Osang angazükba agi heroin ji international markets nung Rs 7 crore shi alang lir.

Tata Bolero gari nung heroin ji packets 100 nung bena lia apu.

Police-i bushitepa aodang heroin ji Manipur nungi Assam-

i bener aruba liasü ta angazük. Iba mozü shibelenba mapa makdoksü atema maneni bushisüingdang südar, ta Assam police-i metetdaksü.

Assam Chief Minister Himanta Biswa Sarma-ia state nung drugs mafia anema police-i mapa tajung inyakba atema tenüingsang agütsüogo.



Deobarnü Silchar nung Trinamool Congress (TMC)-i züngsem aniokba maparen tulu ka tenzükdang agiba noksa angur. Iba sentong ya Assam nungi TMC lennir aser Silchar constituency nungi taoba Lok Sabha MP Sushmita Dev-i ketdangsüa agi. "Centre aser Assam nung BJP sorkari telemsa aser ochimashi politics inyakba anema TMC tanishir Mamata Banerjee-i noktakba atema kanga pelar" ta Sushmita Dev-i tanü ashi. (Silchar, August 29)



Bharat Petroleum Corporation Limited
(A Govt. of India Enterprise)

energising Lives

MAK® LUBRICANTS DISTRIBUTORSHIP SHIMTSÜ OSANG METETDAKTSÜR

Bharat Petroleum ya Fortune 500 ranked Public Sector Oil Company ka lir. Onoki **MAK®** Lubricants yanglur - ibai lintük nung lube brands tajungtibatem rongnung ka lir. **MAK®** Lubricants ya gari yanglur telok tajungtemi agir aser Genuine O ils asoshi OEMs (Original Equipment Manufacturers) den tesendaktep yanglua lir. Onoki yangluba lubricants nungji automotive & industrial lubricants, greases, gear oils, brake fluids aser coolants nungertem dena lir. Onoki **Nagaland** state-tem nung ayoktsü atema Rural Lube Distributors (RLD) shimner.

Tongtepratepdak : Territory Manager - Guwahati : 7738116709

Tejangja temetetsütem onok website yangi angutsü: - www.bharatpetroleum.in → **Tenders** → **View Tender – New Tenders** → **Department: Lubricant Distributorship** → **Tender Type: Press**

Forms can be downloaded from the website which should be filled and submitted along with the applicable fees to the respective territory offices as per detail in website. Corrigendum, if any, will be published only in the website mentioned above.

Application agütsütsüba
tesüsaba anogoji : 21.09.2021 alitsü.



MAK® LUBRICANTS
MAK® makes it possible.

Energising Lives; Energising Naya Bharat



TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 30, 2021

Asenoki Tsüngrem aniba putu

Tanü asenok kija taküm libaliro, lokti, yimten aser arogo sobaliba aser inyakyim ya jungjunga repringdangra, Tsüngremi mulungba nung asen anidaktsür masü saka aseni mulungba nungang Tsüngrem anitsü merangba asenoki asenoksasa repringtetsü. Aseni asen inyaksüba mapa nendaka meinyak ser Tsüngrem dang moajang ta sarasademer. Election nunga asenok inyaknüsü inyaka takok angur aser tesüsabo mapa tamajung inyakba ajak to Tsüngremi mulungba inyak amato Tsüngremi shimtet ta bilema Tsüngrem nem tenüngsang agütsür. Sübokrem amshia mapa ayoker aser alir aser aji Tsüngrem temoatsü kümdaktsür. Yimten nung ketdangsertemi nübortem asoshi terenlok mapa inyaksü lemsükba senotsü aser sensaker aser mekokmeinertem atema lemsüksüba teyari ajak okshia agir aser aji Tsüngremi moatsüba amato Tsüngrem nem bilemdaktsüsü atema, teraka agiteta temeim mapa inyaker, arogo nem tenla agütsür, tenla ki dena yanglutsür aser mission mapa asoshi tenla abener aser tanungba jagi peisasa pei takar akümer. Ashiko, tanü asenok arogo tenla ki yangluba aser tamanger aser tenzüker tajung meliaka arogobo mesamai taküm aliba ya, khen asoshi, ochimashi tenlatem agi inyaktetba aser taküm lidaktsüba mapatem asütsüa akok. Aji oda, ochishia süra ki ka nungang alitsü asü (?) mesüra ochimashiba rongsen agi yangluba sentsüprang ki tajung nungang alitsü ta asüba lenjem nung asenok nokdaka lir. Tasoba küm dena asenoki Tsüngrem tsüngdang miimshitsü meranger. Asenoki Tsüngrem dang taidok meshia sarasademzükli tiyazü bill yanglur, aji oda government file ajak tiyazü agi sünga lir. Asenoki yimten nung takok angutsü mechi Yisu tenüng nung Yisu yimsü magizüktetba purtem den longjemer asenokiang Tsüngrem anishitsü meranger. Joko, alima agi ojangji, kibong maküm tashibo tetsür o tebur na shi nung ka küma temedem ta ashitsü melena Condom amshia kazütsü asoshi arogoia dena ajungshir. Ajibo tezü nung yutsür, joko alima nung nisunger yimya asünungji, parnok lechii oagi tetsür o tetsür na aser tebur na tebur na apuani küma arogoi kibong kümtsür. Aji oda, asen lima nunga joko kasa kidong nungi larlaponger kibong akümbabo tai masü amai agizüka yimten, lokti aser arogo nung shilem agiba angur. Joko, asenok aikati Tsüngremi asenoki tema nung inyaka sayuba mapatem masü saka temulungjang dang agir ta tangatetba agüja larlaponger aser atsüapong kasasa agi apuani küma alitsübaji Tsüngremi mulungba südaktsüner. Aji oda, asenoki Tsüngrem dang "Nü mulung sang" ta masü saka " Kü mulung südakjang" ta dang shia sarasademer. Iba ama Tsüngremi mulungbaji akhi tejen yimsü aser aseni mulungba-ang tanü putu tasenba nung tapet yimsü ta agizüka benshitsüsa alima sobaliba tasen aika agi asenok meketbanger makdi asüba mapang ka nung, asenok ajaki asen meketa kechi ataloker, kechi jembir aser Laishibaia kechi ashir, itemji meteta sensaksemtsü nungdakba agi taoba hopta nung asenoki iba osangkaket ajanga, " Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?" ta asüba onük nung shisalemsatepogo. Atangji, Tsüngremi kobanüa tetsür o tetsür na aser tebur o tebur na shi nung medemtsü aser apuani küma alitsü asoshi melaba aser moatsüba mangur. Ajisüaka, tanü putu nung Tsüngrem tenüng nung arogoi parnok kibong kümtsübaji Tsüngrem nem anidaktsüba arogo masü saka arogoiang Tsüngrem anishitsü merangba purtem asütsü. Ashi, Tsüngremi tebur o tetsür na ajanga alima sünga nütsüng zündaktsünüba agi Adam asoshi tebur masü tetsür-ang ka yanglutsü. Tanü putu nung asen taküm aser kibong nungi tenzüker yimten aser arogo tashi nung asenoki inyakba mapatem ya repringdangra, tebang agi Tsüngrem tetshir dang ashir, asenok teka ochimashiba agi sünga lir aser asen tenük aser temulungjang shi azü azüapong, nüktapangta aser morumoru tsütsü kanga memerüki lir. Tsüngremi mulungbajibo asenok Nineveh leni odaktsüner saka aseni Tsüngrem anir Tarhis leniang onür. Iba jagi tanü asenok ken o tilateri ajak nung mangmangteper aser tangari asenok tzüim nung ajungoka yutsür odi ta jembir. Koba mapa nung südir süang, asen taküm, asen arogo aser asen government-ji Tsüngrem nem manidaktsüra, asenok rongnung tebenja adoktsübasa aser oshi aika küma meputep adoktsü.

OLEMSABANG

Asenok Naga Nungger Asoshi/Atema Yimya Tasen Ka Benshiyonga Aotsüba Ya Kanga Tasak Ta Bilemer

R. Imkong Lkr, Mangimen.

(Yashi adok nungi...)

Parnok terok den par tambo ta tatsüka otsü kar atongtepa alitang kinüngtsü-i yakta süngo molua bener arutsüji aji jemtepa taoba indang otsütem jembitepa talangka mentepa kazüa alitang kibursang jagi ashi, medemertem ozü kidang kecha ali masüji asenokbo "soka rodi" tanga wanga chidi ni? ta asüngdang nung par medemertem jagiang temulungba "jalo" ta ashiji, süra nenok tatsüka mentepa liangma ta shir par tantsü tena jagi yashi alia akaba ajak tu mimong anasai bener aru, aser tamasa she seret ka alia akaba tu mejensaa alangsaa ayu, iba sülen tu metsü mersü lemsa enok, iba sülenji peas, alo, pengana, lemsaa enok, aser kelen yangji haldi masala aser totzü shioka she den tu meyoktep, aser kelen teronem adoka jungjunga sur ajongzüka ayu. Iba sülen tu atta aser moita yua akaba tu seret ana shi agiteta tzü shoker ajepsaa rodi tu yanglua alitang, par medemer kati nia yarisemdi ta aruji par asem jagi rodi tu wanga alitang, par medem nungba jagi ashi, kapur asenok ya nübu aika asünungji tera meperitsü ama repringer, taji ano ama ya tera anünga lir mali ta asüngdangji kibur jagi ashi, ano seret ka shibo lir ko ta ashiji, süra ajia bener arungjo ta ser bener arudaktsü, aser tzü tera shioka ibajia dena ajepsaa rodi-ji yanglua wanga ayu. Iba sülen tu mimong anasa amenba agi asentzü agi temang ajonga sünger asüji tamasa tzü chikomadi ta ser tzü jagi chikodok. Iba sülen tu par medemertemji aja ta ser rodi tu chidi ta ser külemi amen, idangji kibur jagi ashi, nenok chia liang ta ser par apunina tu tanga takdang ka nung mena liasü. Idangji par medemer terok tu rodiji achitsü tenzükdang parnok rongnung karbo tola depen (arm) long sema aliba tu muruketer amen, aser karbo tola tu semzüka ayu ta ser rodi talem den aoun teronem tajung keta sua akaba tu pei sasa asou nung kenoka chitepa liasü, idangji parnok rongnung rodi aser aoun ya jungrara yanglutetogo na? ta jembitepa alitang kati ashir, "Aji tu rodi aro sübji tu iman he besi bal para benaishi na? ta shia chia liasü. parnok rongnung yamaji chitepdang kari rodiji 8-9 tashi achi, kari 9-10 tashi achi, kari 12-14 tashi achi, aser katibo 16-17 tashi chiatok. Yamaji parnok tu longsutepa achidang karibo konang nungsang küma shibai timba chited ta jembitepa liasü, saka idangji kibur nem tubo rodi aser aoun tu tera kata manüngtsü chia toker liasü. Saka rodi tu tesadang kelen rongdoker tejang ana anünga doktsü, ashe ibajia tajung asünungbo chidoker altisüba liasü. Iba sülen tu kibur dangji onokbo odi no! ta shia joko yaser ang ajurutepti ta ser senshia aotang kati ashi, kibur, neri yamaisa chidiaktsü nungbo ano yaser-a-sa arutsü-ago ta shir parnok ajak tu nungzüka oatok.

Iba sülen tu tambo jagi par tantsü tu yipden nung anü-nüa mangataker aliba tu mesua ashi, ozü medemertem tu ajak oatokogo taji anata parnok aoun aser rodi tu koma ka anünga yuja ali arr tilala tanga chidangdi saaker arungma ta shia liasü. Par tantsü tu saaka tejak meytoker kelen, rodi tu kwi anünga yuja ali arr ta ser tzülemchi tu lapokdang nung rodi tu tip kelen rongdoekr tejang ana dokja angu, aser aoun tu repringdang nung krak ta azüngteta chima akaji par tantsü tu kanga aoksa, aser par tambo dang yagi arungjo ta jar chibo aser aounbo tu sayu nung pa tu-a kanga aoksa aser tejashi nung ola tatsüka madoki liasü. Kechiba ta süra kelen par tantsü dang tu kanga aaker (shame) aser kelen par medemertem dang tu kanga jashir, saka koda kang mesü-i akümer ta tatsüka kazür kelen yamai ashi, joko koda asütsü ta o tu tenzüka jembia alitang par tantsü-i judang ia ashi, (interruption) ina, na yashi hajera aoba tu ner medemertem ajak temtsüogo na? ta shir kelen tena tu kanga yaseta aliji rodi tip kelen rongdoker aliba tu tzü jema ka ka lema achi aser joko tantsü-i ashi, item ner medemertem tu azü shiranger ama tesa tanga na? ta shai liasü, oda parnok kibur atemabo khen agi bilemja mali-a na? ta shai alitang kinüngboi ashi, anabo Tsüngremi tang temangbana doktsüra asung aser yanü-a ni hajera maneni aotsü aser tang dang nungia chiyung tajungba ni alia bensür arutsü, idangji tebok sünga jagnratema chiyungtsü, iba dakji alaka ni ne nem nai aki mapang nung sübunüa aliba tola aser süpeti tu alitsütsü, taji tanübo nai mejashie aremzükangma ta mesüzüka liasü. Tantsü, nai yasung kü tang ashi medem tu, ozü medemertem asen kidangi tetibo marudanger kar arura, parnok nemji nai chiyungtsü peria alia bener arua yuja karji ana maak masütsü ta ashir tu tangang bilemteter, na ya shiner tajung ka ama ta nibo bilemer, idangji par tantsü jagi iba oji angashia menürema liasü. Aser idangji ano par tambo jagi ashir, ana tanü rodi aser aoun tu mechia kaa parnok tu peria chidaktsür yoktetbaji ana atema nümatang ulura masü na? ta nibo bilemer. Iba sülen par apunina tu yamai jembitepa liasü, oda asen Aortem aser Moyartemisa soka rodi ya tesapuba achir ta jembitepa liasü.

Iba sülen tu hopta anashi süia or kelen ano Deobar anogo ka atongdang, tenati par tambo hajera aoba sen nungi she (saka shi ta mamshitsüla) seret ka ali, iba denji metsü mersü, pengana, alo, lasun, haldi masala, totzü ajak peria ali, iba denji atta aser moita meyoktepa seret pezü tashi ali-a yua liasü. Aser tananep Deobar anepdang tena tu yamai jembitepa liasü, tanüa Deobar anogo amongerji medemertem karbo arutsü menua mali ta jembitepa alitang par medemer Konyak nungger kibong ka kisemi aru, idangji Konyak nungba tantsü jagi manü ishika den Ali shi ishika ta bener arutsü, idangji Hajera walla (ayangi aosang) kinüngtsü (jagi) jagi kanga pelar-a ta shia liasü. Idangji ano Konyak nungba tantsü jagi tera menürema ner tantsü-a temang tu komasa lir, joko tangibo temsüa alitsüba ser nung ta ashitang hajera walla kinüngtsü menürema jungasa lir ko ta langzüa liasü. Tetezü, joko tangibo tanur amongtsüba mapang ser nung ta shinerba liasü. Iba sülen tu par kibong anaji otsü aika aongtepa süngo yanglua jemtepa kazüteper kelen kibutsüla jagi ashi, asenokbo rodi tanga yanglua chidi ni? ta asüngdang nung par apunina jagiang temulungba asüji, süra ozü tambo nena mena otsü kar atongtepa alitang ner tantsü kenati rodi-ji yangludi ta ser atta aser moita tu seret asemshi agiteta bener aruagi yangji tzü shioka ajepsaa menünger rodi tu aika wanga yanglutena ayu, iba sülen tu she seret ka alia yua akaba tu jungjunga mejena alangsar kelen, yangji alo, peas, haldi masala, metsü mersü, lasun ajak tu meyokteper kelen totzü aika shioker teronem tajung adoka sua ayu. Iba sülen tu tenaprongla tejak deben shidoker par tambo ana tu aja, aser ashi, ner tantsü kenati chiyungtsü tapu ajak tu renema lir, taji nena ta arungma ta ser külemi amen, aser rodi aser aoun tu kenoka tenzüka achi tenzü, idangji Konyak nungba teputsü tenati ashi, rodi korem aro subji tu bisi bal ase o, aro tuita bostu tu item meli aser o ta shia chia liasü. Idangji par tantsü jagi ola madoki kara kara tang rodi tu ter ser pezü tashi angepa chaitok, aser ashi, iman hi kabo, aro bet-i najai ta shia liasü, idangji hajera walla kinüngtsü tu neptzü pangtsü alua menüa liasü. Idangji par, la tepuba jagi ashi, arobi koshis koribo ta shia rodi talem den aoun tu aika tepoka 20 (metsü) tashi achi, iba sülen tu ashi, arobi kabole mon ase, hoilibi bet ti najai ta shia iman he kabo ta ashitang par pezü tu tebok agi tangu-a sashi mejungi alitang asayarji tenük nungi nüktzü alua menütepa alitang, Konyak nungba jagi ashi, moi laka bet-ti rodi aro sübji kham jakra kori aser o, itu time ti moi laka bet tu bisi bikai ase, t ashitang ano tanen mekai menütepdang kolen nungi ola adoker arr memeteti koya chanu asateper amatu khe, khet ta tsü, tsü ta adokba tu angashir ano balaka ajeper ama tu nüktzü yima menütepa kazüyar kelen, senshidang Konyak nungbo teputsü jagi ashi, tarutsü mapang nunga yamaisa chidaktsü nungbo anosa arutsü ago ta shri oatok.

(Maneni asung adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

New Delhi nung putir ka asüba atema Arogoi mangyimer

New Delhi, August 29 (Agencies): August 26, 2021 nü Khristan putir, Jacob Mar Barnabas asüba atema Arogoi mangyimer; pa arrshi küm 60 liasü.

Eastern-rite Syro-Malankara Catholic Arogo nung tongti putir, Barnabas coronavirus tashidak agi shiranga liasü saka pa anepba sülen maneni temang nung timtem adoka New Delhi nung aliba Fortis Hospital nung treatment tagidak liasü.

Delhi kübok Gurgaon Arogo nung putirtem forum nung Tir, James Mathew-i, "April ita nung pa dak coronavirus tashidak puteta liasü aser Delhi nung Arogoi lapokba Holy Family Hospital nung pa treatment agi. Taoba hopta pa anep saka temang nung kanga tashimeiti liasü," ta metetdaksü.

Maneni treatment agitsü atema pa August ita mezüngbuba hopta nung Fortis Hospital-i anir oa treatment tagidak mapang asü.

Mathew-isa, "Putir asüba ajanga Arogo nung tapok

tuluka paaogo. Tang ama mapang ka nung ni o agi rasaa meshiteter," ta metetdaksü.

"Pai sensakertem kanga meima liasü aser pai Arogo mission atema inyakba mapatemji kodanga mamatoktsü," ta paisa metetdaksü.

Barnabas ya mezüng 2007 küm Syro-Malankara Eparchy, St. John Chrysostom of Gurgaon nung putir shim. Iba Arogo ya Delhi kübok Gurgaon area nung lir.

Putir Jacob Mar Barnabas ya kanga tongmelang lenir ka liasü, pai mapa kanga meranga inyak aser 2020 küm March ita nung coronavirus prokba sülen pai yimti lenmangtem nung sensakertem tenzüka aruogo.

Pa ya chichiba missionary ka liasü; pa leniba nung coronavirus agi kongshirtem nem chiyungtsü den hygiene kits lemja aruogo.

Jacob Barnabas ya 1960 küm December 3 nü Kerala nung Pathanamthitta kübok Karikulam nung aso. Parnok adianu asem aser aianu pongu rongnung pa tambusang liasü. Par aianu asem-a Congregation

of the Sisters of the Imitation of Christ nung nun lir, ta Conference of Catholic Bishops of India (CCBI)-i sangdong ka ajanga metetdaksü.

Pa Arogo menden balala nung inyaka aruba sülen tesüsa 2015 küm St. Mary's Cathedral Argo nung putir shima liasü.

Pa küm 34 tashi putir aser küm 14 tashi tongti putir inyakba mapang nung pai yimtsüngtem nung sensakertem tenzüka aruogo.

Meimchir temeden atema inyaker, A.C. Michael-i, Barnabas-i coronavirus wara mapang nung sensakertem atema sorochojka chiyungtsü lema agütsü aser pai iba tashidak mena metsübi liasü ibayongji pai nüburtem tenzüka mapa maneni inyak, ta metetdaksü.

Tawa coronavirus agi putir aika süogo aser parnok rongnung Paul Alois Lakra (Gumla), Basil Bhuria (Jhabua), Pastor Neelankavil (Sagar) aser tongti putir, Antony Anandarayar (Pondicherry-Cuddalore) nung densema lir.

Khristantemi US Tir dang kümzükba maparen maneni inyaktsü mepishir

August 29, 2021: Alima tesem balala nung Khristan teloktemi US Tir, Joe Biden dang America nung aser Afghan nung Khristantem densema lendong nung alirtem

ajak Afghanistan nungi anitetsü atema inyakang, aser iba maparen inyaktsü atema September ita tashi-a atsülangtsüla, ta mepishidar.

Tamalen Biden-i, Afghanistan nungi America nung anitetsü atema mezüng jembiba atema August 31 tashi dang iba maparen inyaktsü ta metetdakja liasü. Iba sülen tan hopta osangbenertem senden ka nung jembidang Biden-i, America nung anir aruba maparen tembangtsü atema aritepa inyakdar, ta metetdaksü.

Tan hopta Bethany Christian Services nung CEO, Chris Palusky-i, sensotem kümzüktsü atema Biden-i

anogo atemzüka ayubaji tim masü, kechiyong Afghanistan nung US mission atema inyaktsü nisung meyrjang aika taküm lendong nung lir, ta metetdaksü.

Paisa, Bethany Christian Services-i Afghan nung refugees 250 linük nung jenokdaksüba maparen nung yariogo, ta metetdaksü.

Church World Service-ia sangdong ka ajanga, Biden-i August 31 tashi dang sensotem aser Afghan nung anitetsü atema inyakra nisung aika samatsü, ta metetdaksü.

Parnokisa, sorkari mapang telatet kecha makai Afghanistan nung lendong nung alirtem ajak US-i anir arutsüla, ta mepishi.

Lutheran Immigration & Refugee Service nung Tir aser CEO, Krish O'Mara Vignarajah-ia, Afghanistan nungi lendong nung alirtem

kümzükba maparen ya tesadang shi dang inyakogo, ta ashi.

Paisa, "US Tiri sensotem, tembar Afghan nung aser lendong nung alirtem ajak mekümzük tashi nisung anir aruba mission manentsüla. Parnok kümzüktsü atema asenoki nangzuka lir, anungji mapang tatong nung asenoki nangzuka aliba meraksatsüla," ta metetdaksü.

Taoba hopta Secretary of Defense, Lloyd Austin-i, atemzüka aliba anogo (August 31) tashi nung US-i America nung anir arutsü, ta jembiba sülen nisung aikati pa kanga aitsüdar.

Tan hopta State Department otongdar, Ned Price-i twitter ajanga, tesüiba anogo pezü tsüngda state department-i Afghanistan nungi aruner America nung dangi call 4,000 ben süa liasü, ta metetdaksü.

ANOGO ABEN TSÜNGREM DEN

Kibubai Temulungjang Bushir

Ni KIBUBAI temulung bushir aser temulungjang tendanger, nisung shia nem pei sentong yari, pai inyakbatem nung tajangzük yari agütsütsü asoshi. Yiremia 17:10


Meimchir ka taküm nung temulungjang ya kanga tongtipang lir, aser ya Tsüngrem tsüngdanga kangasa tongtipang. Tsüngremji temulungjang bushiba Tsüngrem, anungji Pai meimchir mulungjang nung temerük, ochi aser temeshiba lir mali aji bushir. "Ajak dak alaka temulungjang tekelaakba lir aser onsara majung". (Yiremia 17:9)

Yisui parnok tebilembatem meteta ashi, "Kechiba nenoki nenok mulungjang nung tamajung bilemer? (Mathi 9:4). Tsüngremi meimchir temulungjang bushi nung Pai ajak angur, Pa nungi kecha meima meyetet. Anungji nisung shiai pei inyakba yari pai agütsütsü, temulungjang nungi adokba tajung inyakertem nem tajung agütsütsü aser tamajung inyakertem nem tamajung agütsütsü, aser itemji asen mapa masü saka asen temulungjang lir. Kechiaser Pai temulung telongtiba nung alibajia meteter. Aji asünung asen taküm lenmangtem merüka ali asü mali ta reprangdangtsü kanga tongtipang. Meimchir temulungjang ya ajak dang tamajungtiba aser tekülaktiba asünung iba yagi taküm, kibong, lokti yimden, sobaliba aser arogo nung aiben timtem aser tamajung benoka timtemdaksür aser menena raksatsür. Aseni mapa tajung aika inyakaka asen mulungjang merükteta melira tajangzük maka. Anungji mapang ajak nung asen sasa asen mulung bushidanga tamajung tebilemba, mapatem aser shisatsü ajak indoker asen mulung ochi, temerük aser temeshiba semoker Tsüngrem den anogoshia jajadi aser aji Pai mulungba lir.

SARASADEM

Temeim Tsüngrem, kü mulungjang teraksa ya nai yanglujang aser ne tsüngdang merüka aser ochishia litetsü anogoshia nai ni yariangma. Amen

Pope-i Khristantem dang Afghanistan atema sarasademtsü mepishir



August 29, 2021: Pope Francis-i alima tesem balala nung Khristantem dang Afghanistan nung tensa tamajungba akümba atema lumia sarasademjang, ta mepishi.

Tang Afghanistan nung Khristantem densema nisung meyrjang aika taküm lendong nung aliba mapang nung Pope-i iba linük atema sarasademtsü ayongzük.

St. Peter's Square nung jembidang Pope Francis-i, "Ni Afghanistan nung tatalokbatem asadanga arudar, aser kanga shisabulutsür.

Brihostibarnü Kabul airport nung bomb lendong nung asürtem atema ni mangyimer," ta metetdaksü.

"Khristantem ama tang tensa atema asenoki sarasademtsütsüla. Ni ajak dang taliba sarasademtsü aser lumitsü atema mepishir. Tang mapang ya sarasademtsü mapang," ta ashi.

Brihostibarnü (August 26) Kabul Airport kima Abby Gate aser Baron Hotel nung bomb lendong nung US sepaitem,

Afghan nungertem aser tanurtem aika süogo.

Bomb lendong atalokba sülen Afghan nung Khristan densema lendong ajurutsüsa alirtem iba linük nung anitetsü atema inyakba maparen nung tetsükdaksü adokogo.

Tang tashi nungbo ICC-i Afghanistan nung Khristantem tepsetba osang mejangja, ajisüaka Release International otongdar, Andrew Boyd-ibo, Taliban teloki Khristan ka tepsetba onoki jangjaogo, ta metetdaksü.

Osangbener den jembidang Boyd-i, "Taliban teloki phone tem nung Laishiba download süa ali asü maliar mita repranger. Phone nung Laishiba download asüba agi Hazara nungbo Khristan ka tepsetogo," ta metetdaksü.

Afghanistan nung Khristantem timbaka Islam yimsü toktsürtem lir. Tang iba linük nung Khristan nütsüng 8,000-12,000 shi lir, ajisüaka Khristantem kanga reshikangshiba agi Khristan aikati pei tamangba yimsü mimshir.



August 27, 2021 nü Impur nung ABAM Clean Election Movement tenzüka sentong agiba sülen tangokba noksa nung angur. Iba sentong nung ABAM Clean Election Movement Committee züngsemtem densema nisung 61 aden.

OLONG PAITEP # 5921

| | | | | | | | | | |
|----|---|----|----|---|----|----|--|----|---|
| | 1 | | | 2 | 3 | | | | |
| 4 | | | 5 | | | | | | 6 |
| | | | | | 7 | | | | |
| | 8 | | | | | | | | |
| | | | | | | | | | |
| | 9 | | 10 | | | 11 | | | |
| | | | | | | | | | |
| | | | | | 12 | | | 13 | |
| 14 | | | | | | | | | |
| | | | | | 15 | | | | |
| | | 16 | | | | | | | |

| | | | |
|------------------------------|-------|--------------------------|-------|
| TIPILEN | | LANGTSÜNGLEN | |
| 2. Sü jeplok | - (4) | 1. _ _ _ _ i | - (4) |
| 4. O agi merenshi | - (5) | 3. Kasa masü | - (6) |
| 7. Ayongküm li | - (5) | 5. Nüchi masü | - (5) |
| 8. Chiyungtsü mapang süiadok | - (4) | 6. Tashi endok | - (5) |
| 9. Tsüngrem den jembiba | - (9) | 9. Langtem | - (5) |
| 12. Saklok | - (4) | 10. Anü malidang | - (6) |
| 14. Samaba mebushitet | - (5) | 11. _ _ _ _ _ kibur | - (5) |
| 15. Mejanga onü | - (5) | 13. Tebur tembar tsüngda | - (4) |
| 16. Tzü shiruru ka | - (4) | jatepba | - (4) |

OLONG PAITEP # 5920 TELANGZÜBA

| | | | |
|-----------------------------------|--|---------------------------------|--|
| TIPILEN : | | LANGTSÜNGLEN : | |
| 1. Alang, 3. Pakti, 7. Bangka, | | 1. Amena, 2. Aibelen, 4. Ayak, | |
| 8. Sar, 9. Menungrar, 10. Pen, | | 5. Tenyar, 6. Ngs, 8. Sangküm, | |
| 14. Kümzük, 15. Anema, 16. Kimen. | | 9. Menden, 11. Kilen, 12. Aküm, | |
| | | 13. Ama. | |



WARAKLA KUNDA MATEMER :

Warakla : Tambu, ni onok Self Help Group meetingi odi no. Amarashi ni koma angur, blouse tasenba yagi azü mazü?

Alokba : Waa, kechi mazütsü. Company jagi na atema yangluba ati.

Warakla : Thank you, nabo sangro zülur nisungji ka machemang koto.

Alokba : Theek hai."Aya, ammanng nung ita maliba onung milen makadang petinu tuluka adoka ayar ama, nai sangwadaktsüra nii. Saka nü süoshi, nü make-up alidang asenbo sentsürongi yiogo. Sentsü meshir zünra, kü itasen ajunga len Tom nung dang sentsü omar teka tazüng ki atonger- - -

Warakla : Ojang dang purapujiang Alokhangba!
Lilir : WhatsApp

TANÜBO NAI LANGZÜANG

Q. Koba küm Hindustan Aeronautics Limited tenzük?
A.1940 B.1945 C.1950 D.1955
_____ (Taruba adok nung onoki langzüksü)
YASHI ADOK TELANGZÜBA : Suriya Sivakumar

AO OSHI ANGAZÜKDAK:

TANÜ ANGAZÜKTSÜBA OJANG



Kulang

(n) tokolak nung ku telang kuma alenba (hair bun)

* Tetsür ku talang awartemi **kulang** kanga junga alanger.

Kuli (v) hau ta metetdaksüba/ o soitba (witness)

* Moaba nisung tajunga ta yimteni **kuli** agütsü.

NAI-A YA METETTER MA?

BOLLYWOOD NUNG TAA TIMTIBA ANGUR ACTOR/ACTRESS KAR: 2021

- Akshay Kumar 122 Crore
- Salman Khan 100 Crore
- Shah Rukh Khan 85 Crore
- Amir Khan 75 Crore
- Hrithik Roshan 67 Crore
- Ranbir Kapoor 60 Crore
- Ajay Devgan 55 Crore
- Johan Abraham 45 Crore
- Varun Dhawan 40 Crore
- Shahid Kapoor 35 Crore
- Tiger shroff 30 Crore
- Deepika Padukone 29 Crore
- Kangana Ranaut 24 Crore
- Priyanka Chopra 18 Crore
- Kareena Kapoor 15 Crore
- Shradhha Kapoor 15 Crore
- Katrina Kaif 11 Crore
- Alia Bhatt 10 Crore
- Sonam K Ahuja 10.5 Crore
- Vidya Balan 9 Crore
- Anushka Sharma 8-9 Crore



SUDOKU # 5962

TELANGZUBA # 5961

| | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|
| 2 | 6 | 1 | | | | 4 | 9 | 3 | 2 | 9 | 6 | 7 | 8 | 4 | 5 | 1 | |
| 7 | | | 3 | 1 | 2 | | 6 | | 1 | 8 | 7 | 5 | 2 | 4 | 6 | 3 | 9 |
| | 3 | | | 6 | | | 1 | 7 | 5 | 6 | 4 | 9 | 1 | 3 | 7 | 8 | 2 |
| 1 | | 3 | 5 | | | 6 | 8 | | 8 | 4 | 5 | 7 | 3 | 9 | 1 | 2 | 6 |
| | | 9 | | | | | | | 7 | 3 | 1 | 2 | 6 | 5 | 8 | 9 | 4 |
| | | | 8 | | | 9 | | 1 | 6 | 9 | 2 | 8 | 4 | 1 | 3 | 7 | 5 |
| | | | 2 | | | | 7 | | 4 | 5 | 8 | 1 | 9 | 7 | 2 | 6 | 3 |
| | | | | 4 | 9 | 5 | | 2 | 2 | 7 | 3 | 4 | 5 | 6 | 9 | 1 | 8 |
| 3 | 5 | 2 | 1 | | | | | | 9 | 1 | 6 | 3 | 8 | 2 | 5 | 4 | 7 |

OJANG LUTEP # 5507

- BUNÜR :
- SGZÜKAJANTÜ :
- ASSOHI :
- BOKARI :
- EIP :
- PANMAG :
- GSERONN :
- OKBINDA :
- ASAMESI :
- AKEINYR :

OJANG LUTEP TELANGZÜBA # 5506

SHIA METET AMA TEBANG AGIBO RAJEMA JEMBR
SAKA MAPABO MALI

TAN HOPTA ATEMA - KOMA SÜLA ?

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümstsü state government-i agizük nunga koma süla ?



August 29, 2021 nü Punjab kübok Patiala nung aluyimer union balala nungi aluyimertemi Haryana Police aser sorkari yashi Karnal nung aluyimertem dak azükba anema longkak aitba noksa nung angur.

Tanurtem vaccine magi tashi school melapoki atatsüla: Dr Trehan

New Delhi, August 29 (Agencies): Tanurtem aser tain naprongla nem agütsüsü atema Zydus Cadila indang DNA vaccine amshitsü temelaba agütsüogo, anungji tanurtem nem vaccine magütsü tashi sorkari taruba ita 2-3 school melapokdaksüi atatsüla, ta Medanta Chairman aser Managing Director, Dr Naresh Trehan-i metetdaksü.

Osangbener den jembidang Dr Trehan-i, "Asenok ano tali kümdanga alitsüla, ta nibo bilemer. Vaccine (tanur aser tain naprongla atema vaccine) angutsü atema mapang ana nung lir, kechiyong drug controller-i Zydus vaccine amshitsü atema temelaba agütsüogo. Nisungtemi vaccine dose ka danga agiyonga wara nung shilem 30 nungi shilem 50 tashi kümzüksü. Anungji asenoki vaccine mangu tashi aser tanurtem vaccine magi tashi ano ita ana-ase m aremzüka atatsüla, iba sülen ang school tem lapoktsü atema

melatsüla, kechiyong tang asenoki school tem kanga aritepa lapokdar," ta metetdaksü.

Delhi sorkari September 1 nungi tenzüka class 9-12 purtem atema school lapoktsü sangdongba sülen Dr Trehan-i iba osang ya metetdaksür.

Ajisüaka Delhi nung kaketshirtemi pei tsüraburtem den angatetteper ang class-i aotsü. Doctor aser shisashirtem karibo school tem tanaben lapoktsü mepishir.

August 23 nü Drugs Controller General of India (DCGI)-i Zydus Cadila indang DNA vaccine taintem nem dang masü saka arrshi küm 12 dak tema tanurtem nem-a agütsüsü atema temelaba agütsüogo. Linük nung coronavirus third wave tenzüksü, ta mongin aika sangdongba sülen iba vaccine amshitsü atema temelaba agütsür.

Tawa National Institute of Disaster Management (NIDM) indang mongin committee katia

October ita nung coronavirus wave tasembuba tenzüksü aser iba mapang nungji tanurtema kongshitsü, ta tekümdangtsü osang ka sangdonga liasü.

Medanta Chairman aser Managing Director Dr Trehan-isa, "US nung school tem tanaben lapokogo saka vaccine agiba sülen-a tanur aika dak coronavirus putet," ta metetdaksü.

US nung Association of Paediatrics-i, school tem tanaben lapokba sülen July ita nung hopta shia nisung 38,000 dak iba tashidak putet aser August ita nungbo hopta shia nisung 180,000 dak iba tashidak puteta arudar, ta metetdaksüogo.

Dr Trehan-isa, "Tanur aika dak iba tashidak putetra parnok yaritsüsa India nung facilities peria mali. Ibaji dang masü India nung tanurtem atema paediatrics doctors peria mali, tanurtem atema ICUs aser ventilators peria mali," ta metetdaksü.

India nung ano nisung 45,083 dak Covid putet aser 460 asü

New Delhi, August 29 (Agencies): India nung ano nisung 45,083 dak coronavirus putetba sülen tang tashi nung India nung nisung crore 3.26 dak iba tashidak putetogo, ta Amongnü Union Health Ministry-i metetdaksü.

Tesüiba ghonda 24 tsüngda linük nung coronavirus agi shiranger 460 süogo aser tang tashi nung ajak senteper

4,37,830 süogo, ta Amongnü anepdang 8:00 ako nung Ministry-i metetdaksü.

Tesüiba anogo pongu tashi linük nung coronavirus agi teshirangdakpur timba-timba kümdar, aser tang teshirangdakpur 3,68,558 kümogo.

India nung tang tashi nung coronavirus vaccine dose crore 63 dak tema agütsüogo aser iba nungji tesüiba ghonda 24

tsüngda dose 73,85,866 agütsüba densema lir.

Linük nung coronavirus vaccine dose 63,09,17,927 agütsüogo aser itemji session 67,80,301 nung agütsüba lir, ta parnokisa metetdaksü.

Tang tashi nung samples 51,86,42,929 tendangogo aser iba nungji Honibarnü samples 17,55,327 tendangba densema lir, ta ICMR-i metetdaksü.



August 29, 2021 nü Patna nung Bihar Chief Minister Nitish Kumar, JD(U) national Tir, Rajiv Ranjan Singh (tiyong) aser party national parliamentary board nungi Upendra Kushwaha (ajichi) nung Janata Dal United party senden nung adenba noksa nung angur.

Afghan tensa nung ajemdaker asalentong yanglutsü: Rajnath

Nilgiris, August 29 (Agencies): Taliban teloki Afghanistan linük agiba dak sendakba nung Amongnü Union defence minister,

Rajnath Singh-i, Afghanistan tensa ya India atema tayongzükba ka kümogo, aser asenoki iba tensa nung ajemdaker asalentong yanglutsüla, ta metetdaksü.

Defence Services Staff Colleges nungi züngsemtem den jembidang Rajnath-i, "Tang tensa ajanga asen linüki asalentong melentsüsa akümer. Afghanistan tensa ya asenok atema tayongzükba ka kümogo. Item tensa ajanga asen linüki asalentong tanaben

bilemdanga yanglutsüsa akümer. Onoki asen asalentong yanglushir aser iba atemaji QUAD tenteter," ta metetdaksü.

Defence ministry-i Afghan tensa nung ajemdaker Integrated Battle Groups tentetsü atema bilemdar, aser 'Integrated Battle Groups' yagi tsükchirtem den raratsü, ta paisa shisem.

"Raraba mapang nung tekaraba nung telemetba agitsüji kanga tongtibang. Item group-i tekaraba nung telemetba agiba dang masü saka raratsü atema tekaraba nung units tentetsü," ta Defence Minister-isa metetdaksü.



August 29, 2021 nü Kolkata nung Trinamool Congress Lok Sabha MP, Mala Roy (abelen nungi tanabuba) aser party MLA Nayna Bandopadhyay (abelen) nati Congress toktsür Trinamool party nung adener ana- Shikha Mitra aser Shuvra Ghosh na nem party wako agütsüba noksa nung angur.

Nehru noksa mamshiba atema P Chidambaram-i ICHR aitsür

New Delhi, Luroi/August 29 (Agencies): India nung nuchiso anguba sülen küm 75 ajungba benjungmong nungtem nung mezüngbuba digital poster nung India nung mezüngbuba Ato kilonser, Jawarharlal Nehru noksa mamshiba atema Congress lenir, P Chidambaram-i Indian Council for Historical Research (ICHR) sashia aitsüogo.

Amongnü Chidambaram-i, Indian Council for Historical Research (ICHR) nung member secretary, K Ratnam-i tesempa tsüngdang apudaker, ta aija pa dang gari mezüng yanglutetba atema benjungdang Henry Ford tenüng mamshitsü asü?, mesüra tayimtsü mezüng yanglutetba atema benjungdang Wright brothers tenüng mamshitsü asü?, ta asüngdang.

Ford-i mezüng gari yanglutetba liasü aser Wright adianu anati alima nung mezüng tayimtsü yanglutetba liasü, aser parnok tatishitsü amshia India nung nuchiso anguba sülen küm 75 ajungba benjung nung mezüngbuba Ato kilonser noksa mamshiba atema taoba mapang Union Finance Minister, Chidambaram-i ICHR aitsür.

"India nung nuchiso anguba sülen küm 75 ajungba nungtem nung mezüngbuba digital poster nung Jawarharlal Nehru noksa mamshiba atema

ICHR Member-Secretary-i kuli agütsübaji temenünütsüka lir," ta Chidambaram-i twitter ajanga metetdaksü.

"Tesempa matsüngdang apudakba sülenbo Member-Secretary-i ola madoki aliba tajungba süla," ta Chidambaram-isa metetdaksü.

"Gari yanglutetba atema benjungdang pai (ICHR Member secretary) Henry Ford tenüng züngdoktsü asü? Tayimtsü mezüng yanglutetba atema benjungdang pai Wright brothers züngdoktsü asü? India nung science atema benjungdang pai C V Raman züngdoktsü asü," ta Chidambaram-isa asüngdang.

ICHR indang 'Azaadi ka Amrit Mahotsav' benjung nung Nehru noksa mamshiba sülen opposition party balalai sorkar sashia aitsüdar.

ICHR-i adokba 'Azaadi ka Amrit Mahotsav' poster nungji Mahatma Gandhi, Subhas Chandra Bose, Bhagat Singh, B R Ambedkar, Sardar Vallabhai Patel, Rajendra Prasad, Madan Mohan Malviya aser V D Savarkar nung noksa lir, aser iba poster ji ICHR indang website nung lir.

Chidambaram dang masü saka Jairam Ramesh, Gaurav Gogoi aser Shashi Tharoor nung densema Congress lenir aikati ICHR aitsüogo.



Afghanistan nungi aruba tayimtsü ka nungi British armed forces 16 Air Assault Brigade indang züngsemtem Oxfordshire, England nung aliba RAF Brize Norton ayazüka aluba noksa nung angur. UK-i hopta ana nüburtem aser ketdangsürtemi anir aruba maparen tembangba sülen Kabul nungi British sepai aser diplomats tem bena aliba mitkar indang tayimtsü ya UK air base nung anena liasü.

Ashraf Ghani-i aibelen ka menaogo: Suhail Shaheen

Kabul, Luroi/August 29 (Agencies): Taliban otongdar Suhail Shaheen-i, August 15 sülen linük nung mepetmesü adokba Ashraf Ghani dak tai tongloktüsügo aser ashiba agi, pai ajungbena sorkar toktsübaji aibelen ka liasü.

Doha News den sensaksemba mapang otongdari, August 15 nü Taliban pur yimjung nung tashi melenteptsü atema renemer sepaitem Kabul tezülén atatepa aliba mapang Ashraf Ghani ajungbena jena oadok, ta ashi. "Pai sorkar sentoka tokja aibelen ka menaogo. Iba ajanga ajungbena ongdang ka adok aser rakzükrakdem aser khatepba tali bulua aküm," ta Taliban otongdari ashi.

Ashraf Ghani-i sen aika bener jena ao ta osang adokba dak sendakba nung Suhail

Shaheen-i ashiba agi, pai pa indang masüba langka kar danga bener orr lira pai Afghanistan nem meyipa agütsüsüla, saka ibaji bushia aotsü atema Taliban asoshi maparen tongtibangtiba ka masü, kechiyong sorkar tasen ka amenoktsü atema rangloker inyaktepdar.

Kasa mapang nung sen aika bener linük toktsür jena ao ta adokba osang ya Ashraf Ghani-i magizük. UAE nungi pai osang ka ajanga ashiba agi, azütokshi nungi jenbotsü atema pa linük toktsür aotsüsa aküm. Pa tsüngsem melentsü dena mapang maliasü, ta pai ashiba den sen aika bener aotsüji otsü mali, ta ashi.

UAE-i Ashraf Ghani aser par kibong agizükba dak sendakba nung Taliban otongdari, UAE den Ashraf Ghani tesendaktep tajung liasü,

ta ashi. Ajisüaka iba ajanga Taliban den UAE tesendaktep meytettsü ta masü. "Qatar nung onok indang office amenoka lir. Onok UAE den sendaktepa lir. Ashraf Ghani nem tejenokdak agütsüba ajanga parnok policy sayur. Iba tetezü onok den parnok tesendaktep mali ta masü," ta otongdarisa ashi.

Kabul nung bomb mapok tsüngda interview nungsa pai, bendangleni aotsüba dak atemer airport nung nisung nongtepa alidak ISIS puri lendong bener arutsütsü tasa asaba osang angazükba sülen Taliban puri linük nung Afghan nunger ajak aser pari ajak bushitsüngdangdar, ta ashi. Security dak sendakba nung kuli kaket tejangja maliba Afghan nungertem airport-i aotsü atema temelaba magütsü, ta paisa ashi.

Singapore ya COVID-19 vaccine timtiba agiba linük kumogo

Singapore, Luroi/August 29 (Agencies): Singapore nung nütsüng yongsük million 5.7 aliba nungi shilem 80 bo COVID-19 mozü agiogo, ta ketdangsürtemi ashir, anungji alima nung mozü timtiba agiba linük ka akumer aser tashidak wara aziüoktsü asoshi temelaba akumer.

"Asenoki alizüng ano ka tongtetogo, kong asen nütsüng shilem 80-i vaccine dose anaprong agiogo," ta Singapore indang Health Minister Ong Ye Kung-i Deobarnü Facebook post ka nung ashi.

"Iba tetetzü Singapore nung COVID-19 anema raraba nung asen sasa tali kumkumshia aliba sayur."

Iba yongji linük tilaka ya alima nung vaccine agiba tsütsü tematiba jenjang nung lir, ta Reuters news agency ajanga asadangtet.

Danga linüktem COVID-19

mozü aika agir aliba linüktem nung United Arab Emirates, Uruguay aser Chile densema lir, kong nütsüng yongsük shilem 70 dak tema mozü agiogo.

Singapore nung mozü agiba maparen ya January ita tenzük aser parnoki timba Pfizer-BioNTech aser Moderna ajanga yangluba mozü amshia arur.

Singapore-i maneni kanga sashia kangshiba ya aziüoktetra aser asen healthcare tashi tali melulara, linük nung maneni rongsenketzüng lapoktsü aser lokti inyaksangshi melatsü aser quarantine mesüi senzüsempongtsü melatsü, ta August ita Ong-i shia liasü.

"Asenok takum akhi ama akumtsü aser asen libaliru tajungba kumzüka ayutsü," ta pai ashi.

Ong den ano minister anati June ita Straits Times nung olemsapang züluba nung 'new

normal' ya koma alitsü, ta rateta zülua liasü.

New Year Countdown ama lokti tulu adenshiba maneni alitsü aser businesses tem inyaksangshi nung timtem majurutsü, ta parnoki ashi.

Singapore nüburtem iba virus aziüoktetba linüktem nung maneni senzütsü melatsü.

"Asenoki vaccination certificate ya akumtsübua a m s h i t s ü . Senzüsempongertem, talisa mozü agir alirtem linük yutsür maodang tendangtsü aser meyipa shilangba sülen negative adokra quarantine masütsü," ta parnoki ashi.

Honibarnü Singapore nung COVID-19 cases tasen 113 liasü, ta Channel News Asia ajanga ashi. Iba linük nung tashidak wara tenzük tang tashinung COVID-19 tashidak agi nisung 67,171 menepogo aser asüba nisung 55 alitsü.

Houthi teloki Yemen nung airbase base ka amak; nisung 30 asü

Sana'a, Luroi/August 29 aitsüogo.

(Agencies): Deobarnü Houthi telungpurtemi Yemen nung airbase tulutiba amakba sülen nisung 30 asü aser nisung 60 yirutsüogo, ta Southern forces otongdari ashi.

Sorkari atsünger aliba Lahij province nung amenoka aliba Al-Anad air base amakba osang metetdaksüogo.

Saudi-i aniba military coalition-i teyari agütsüba aser alima kintemi agizükler aliba sorkar aser Iran den sendaktepa aliba Houthi telungpurtem 2014 küm nungi raraa arudar. Houthi telungpurtemi linük yimtiba Sanaa amokbangba sülen telok ana tsüngda mangatettep tenzük.

Armed forces otongdar Mohammed al-Naqib-i, iba lendong nung nisung asübabo osangbo jangjatsüogo saka nisung kwi asü iba indang osang tejangja magütsü. Paisa, telungpurtemi missile aser drone amshia airbase amakba

Local pro-government ketdangsür kati iba lendong nung nisung asüba indang osang tejangja agüja liasü.

Tang tashi nung iba tatalokba dak sendakba nung telungpurtemi osang kecha agüja mali.

2019 küm Houthi telungpurtemi, parnoki military parade ka agia aliba mapang drone amshia Al-Anad amak ta ashi aser medics aser sorkar source balala ajanga iba lendong nung nisung trok asüba osang metetdakja liasü, kong tongtibang intelligence ketdangsür ka densema liasü.

Al-Anad ya Yemen anütoktiplen aliba Aden yimi nungi km 60 shi pilar lir. Iba base ya Houthi telungpurtemi matsüng tsüngda 2014 küm March ita tashi US sepaitem indang headquarters liasü.

Iba sülen 2015 küm August ita sorkar sepaitemi Saudi-i aniba sepaitem teyari nung iba basen tanaben atsünga liasü.

Hurricane Ida: Nisung meyirijang aika Louisiana yutsür jena aor

Baton Rouge, Luroi/August 29 (Agencies): Gulf of Mexico nungi Hurricane Ida anasai aruba mapang nisung meyirijang aika US kübok Louisiana state yutsür jena aor.

Ida ya tangbo 'category four hurricane' kumogo, koba tematiba yipru dang shilem ka agi tajemba aser mopung ya ghonda ka nung kilometer 225 (140mph) tashi kara aoner.

Iba yipru ya Deobar nikongdang tashinung alinük tonga arutsü imlar, anungji nisung takum asoshi lendong tulu aketba yipru ka lir. Iba ya Hurricane Katrina dang tashi tuluba asütsü akok, koba agi 2005 küm New Orleans tesem tuluba nung teraksa tulu agüja liasü.

Nüburtem dang yipru agi kanga sashia kongshitsüba tesemtem yutsür ainshitsü totuyuba agütsüba ama parnok ainshiba mapang lenmang nung garitem marakzütteti akum.

Iba yipru ya state nung küm 150 nung tesashitiba asütsü akok, ta Governor John Bel Edwards-ia tekum dangtsü shiogo.

"Taanung na mejangdang iba yipru nungi kumzüka alitsüsa tesem bushia mejangtsüla aser

renemshia alitsüla, kechiaser asüngbo tsüngsang ya kanga kera tamajungba akumtsü," ta pai Deobarnü tekum dangtsü ashi.

Anasa aliba Mississippi indang governor-i state of emergency sangdongogo.

Tir Joe Biden-ia Ida ya lendong kangasa tulu aliba yipru ka akumer aser federal sorkari teyari agütsütsü renema lir, ta ashi.

National Hurricane Center-i Deobarnep 9:00 GMT ako (par mapang) nung Ida ya Mississippi ayongpang nungi soutsü tsütsü mile 75 shi pilar lir aser north-west tsütsü ghonda ka nung mile 15 tashi kara arur, ta ashi. Iba yipru ta tang tashi tzüym nung lir, anungji meilongi tashi tuluba akumtsü.

Tamalen Ida yagi Cuba nunga kongshia süngdong laodaktsü aser kilem shisatsü, aser Jamaica nung tzünglu kanga sashia arua liasü.

Hurricane Katrina agi New Orleans nung 'category three' ama arua kongshir Deobarnü agi küm 16 ajunger. Iba yipru yagi yimti shilem 80 nung tzümetsüng agi metzüngbanga nisung 1,800 dak tema asü.



Afghanistan refugee tem atema "Open Door" policy tenzüksü aser immigration ken o tekeraba nung jembitsü asoshi takhangba agüja Los Angeles nung longkak aitba mapang tangokba noksa ka yangi angur.

SÜR KÜM 1 AJUNGBA



Lt. Prof. N. Imsen
30-08-2021

"Asenok den mali, ta jashia teli, saka pa liasü ta pelaa lidi."
I bri nunger Shin O

Taküm ka junga litetbaji senmang, tepela aser konang; ibaji kodanga mamatoktetsü aser asen melungjang nung teti alitsü.

Tasü madak temeimi takok angur, ta onoki metet.

Onoki Obala maneni meimer, ibayongji pa onok den teti lir.

Temeim Kibong züngsemtem.

'Criminal Justice'-i Best Asian Drama award angu

Mumbai, Luroi/August 29, 2021 (Agencies): Content Asia Awards 2021 sentong nung, Regional/International Market atema Pankaj Tripathi aser Kirti Kulhari na indang 'Criminal Justice: Behind Closed Doors'-i Best Asian Drama Series Award angu.

Asian market atema Content Asia team ajanga Content Asia Awards achaayanger.

BBC Studios den Applause Entertainment longjemer produce asüba 'Criminal Justice' indang mezüng season takok ngur sülen, iba franchise nung season tanabuba ya December 2020 nung 'Criminal Justice: Behind Closed Doors' ta nungja agütsür saya.

Iba series ajanga tereprangertem atsüa aruba den külemi tarutsü nunga iba

franchise takok ngua inyaksü asoshi lenmang lapoktsüogo.

"House of Applause nungi sayaba mezüng show rongnung 'Criminal Justice' Season 1 liasü aser iba franchise takok ngua aoba angudang tebang agi rasa meshitetsüsa pelar aser nümatanger," ta award anguba sülen, Applause Entertainment indang CEO Sameer Nair-i ashi.

Kenny Malone alima nungi pilaogo



New Delhi, Luroi/August 29, 2021 (Agencies): Drum atemtsü sempet tajung alisang, Kenny Malone, shibai nungtugu kentener Dolly Parton aser Waylon Jennings indang ken nung drum tema shilem agi, pa Covid-19 tashidak ajanga arishi küm 83 nung süogo.

Denver, Colorado nungi America nunger drummer aser percussionist, Kenny-i tangar teyari magii pa sasa drum atemba yimya aser tasa balala amshiba atema alimai pa jangjaa liasü.

1970s mapang nungi tenziuka folk, country, aser tanga acoustic dak sendakba genre balala nung Malone ya musician takoktet ka liasü.

Malone'er medemer aser taoba mapang külem band nung züngsem Dave Pomeroy-i pa

(Malone) asüba osang lemsatepa liasü. Covid-19 tashidak putetba sülen, Brehostibarnü Malone iba akümlü nungi pila oadok," ta Billboard.com sangdong ka ajanga metetdaksü.

Malone-i kensep talisa Dolly Parton indang 'Jolene' aser Jennings indang 'Dreaming My Dreams' densema Nashville nung yangluba record noklang aika nung pai inyakogo. Iba den külemi tanga artist talisa Dobie Gray, Ronnie Milsap aser Crystal Gayle nunger dena pai inyakdangogo.

"Nashville nung drumming tsütsü pai alakteta inyakogo aser teti nunga pai drum atemba tasa aser yimya tasentem puratet. Iba den külemi music den apert drum ola balala adokdaksütsü asoshi pai stick' aser brush' tem amshia liasü; aser item temeyoktep tasa ajanga ken tali tepor jungdaksü," ta Pomeroy-i ashi.

Malone-i Navy nung aden aser küm 14 tashi tenziuk. Iba mapang, musicain ka ama pai U.S. Navy Band nung inyakogo. 1970 küm pa Nashville-i aru aser Nashville

nung nungtugu producer "Cowboy" Jack Clement den longjemer music wadang nung inyak tenziuk aser iba jila nung Malone ya ajaki sapuba drummer aser percussionist takoktet ka aküm.

Bobby Bare, Garth Brooks, Johnny Cash, Emmylou Harris, George Jones, Barbara Mandrell, Charley Pride, Kenny Rogers, Dottie West aser Don Williams indang record tem nung Malone inyakogo, ta Country Music Hall of Fame & Museum-i metetdaksü.

Luroi/August 29, 2021 (Agencies): 'Reptile' indang cast rongnung Justin Timberlake denogo. Iba movie nung, arishi küm 40 tain Justin-i actor Benicio Del Toro den külemi shilem agiba angutsü aser iba movie yanglutsü atema Netflix-i 'rights' nguogo.

Iba movie ya, estate agent ka tepsetba ken o nung detective (Del Toro) kati bushisingdangba indang otsü ka asütsü.

Nungtugu music video

OFFICE OF THE AKHOYATSÜR TELONGJEM DIMAPUR

Dimapur - Nagaland.

Konang Tetushi Agütsür

Tsürabur tajung asür I.Nükshi aser Wt.Limalemla na jala, Wt.I.Moakala Jamir, Associate Professor (Economic department), Zunheboto Govt. College, lai ICFAI University, Nagaland nungi "Economics and Environmental Consequences of Climate Change on Agricultural Production (Jhum Paddy)" onük nung shisatsü tasen bushiteta Ph.D jenjang anguba aser ano, Wt.Thechano Merry (Wb.Lanumeren Longkumer kinüngtsü), lai Nagaland University Lumami nung Chemistry department nungi " Synthesis of Natural Product based organic Anthracene Scaffolds and bone of their Anti-Cancer Activity," onük nungi tashitemetet tulu bushiteta Ph.D jenjang ngutetba takok asoshi Akhoyatsür Telongjem Dimapur-i tenaprongla nem konang tetushi tulu agütsür aser tena takok tajung agi onok nümadangtetter.

Ano maneni Tsüngremi nenaprongla taküm aser kibong nübor tenziuka mapa nung moajangma ta sarasademtsür.

Sd/-
Aienla Jamir
President, ATD.

Sd/-
K.Tainla Imsong
Secretary, ATD.

Office of the Village Council Changki

Mangkolemba Sub - Division
Mokokchung District, P.O. Changki : Nagaland

TENÜNGSANG AGÜTSÜR

Lt. Col. Tinu'er jabaso Wb. Menangmeren NPS-i Superintendent of Police menden tongtetba atema Village Council Changki ajanga pa nem tenüngsang agütsür.

Nai ajangzükba aser nübor tenziuka wadang nung bendanga agüja inyakbatem ajanga aika ajungmesotsü. Maparen tasen nung ajemoka inyaka aodang, na atema Tsüngremi tawabangba aser shisatsü meshizüktsür aser tarutsü nunga Tsüngremi na maneni maajangma ta onoki sarasademtsür.

Sd/-
Lendimenba Amri
Chairman

Sd/-
Imodangba Pongen
Secretary

Indian Army-i Rangapahar nung sentong ka ayongzük

Kohima, Luroi/August 29, 2021 (TYO): 'Swarnim Vijay Varsh' benjongmung shilem ama, Honibarnü (29.08.2021) Rangapahar Military Station, Dimapur nung alir lanurtem aser kibongtem; aser Dimapur nung School aser College balala nungi NCC Cadets tem atema Indian Army-i rara dang amshiba hadir/prangbong tem aser pipe band sayuba sentong ka ayongzük, ta PRO (Defence) Kohima sangdong ajanga Lt Col Sumit K Sharma-i metetdaksü.

Spear Corps ajanga iba sentong ayongzüka liasü aser Dimapur kübok School aser College balala nung NCC Cadets 200 shi aruagi denogo.

Iba sentong nung, sepaitemi rara dang amshiba prangbong aser tanga hadirtem sayu; aser Army pipe band ajanga parnok inyakyim

sayuba den külemi sentong nung adenertem den sensaksema liasü, kong shilem agirtem dang Indian Army indang maparen aser inyakyim balala metetdaksü.

Kasa mapang, army nung adentsü yimya aser inyakyim tem meteta alitsü asoshi, NCC Cadets temi Army ketdangsurtem aser iba wadang nung inyaker tulu tila ajak den sensak asemtsü maongka angu.

Military Band ajanga atemba kongki, jemji aser asem (drum) ola balala ajanga sentong nung adenertem tali saksalemdaksü. Iba mapang sentong nung adenertem talisa NCC Cadets temi tajangshiba tasen anguba den Army nung adentsü asoshi parnoki tejangraba tanela tulu sayua liasü, ta kasa sangdong nung shia lir.

Justin Timberlake-i 'Reptile' nung shilem agitsü

Luroi/August 29, 2021 (Agencies): 'Reptile' indang cast rongnung Justin Timberlake denogo. Iba movie nung, arishi küm 40 tain Justin-i actor Benicio Del Toro den külemi shilem agiba angutsü aser iba movie yanglutsü atema Netflix-i 'rights' nguogo.

Iba movie ya, estate agent ka tepsetba ken o nung detective (Del Toro) kati bushisingdangba indang otsü ka asütsü.

Nungtugu music video

director, Grant Singer-i iba movie direct asütsü. Film wadang tsütsü Grant-i director ka ama mezüng inyaksü terenemba lir. Grant-i Benjamin Brewer den külemi iba film atema screenplay zülutsüogo.

Black Label Media atema Molly Smith, Trent Luckinbill aser Thad Luckinbill nungeri iba project produce asütsü. Kasa Media company atema, Seth Spector-i co-producer ama nungittsü. Del Toro-i iba film nung tongti shilem agiba dak

alaka, pai Rachel Smith den külemi executive producer ama inyaksü.

Nungtugu pop star Timberlake-i 'Trolls' franchise, 'Friends with Benefits' aser 'The Social Network' nung shilem agiba sülen, Netflix indang project ka nung pai shilem agitsü asoshi maongka nguogo.

'Can't Stop The Feeling' atema, Justin-i Oscar nomination angu. 'Trolls' indang mezüng movie soundtrack nung iba ken amshiogo.

Nagaland nungi MMA asayar aseme GAMMA Championship 2021 nung medal angu



Dimapur, Luroi/August 29 (TYO): Nagaland nungi mixed martial arts (MMA) asayar aseme Honibarnü Global Martial Arts Association (GAMMA) Asian MMA Championship 2021 nung medal nguogo.

Kekhrieneitso Angami (70.3 kg) aser Longtsukumba Ao (771 kg) nati lightweight aser welterweight division nung silver medal angu aser Arsenba Ozukum-i (56.7 kg) flyweight category nung bronze medal

ngua liasü.

Final asaya nung Kazhalchstan nung asayar Nurtaza lumakhanova den asayaba mapang Kekhrieneitso-i asaya tembanga masayateti anen aser Longtsukumba Ao, Palestine nung sayar Yazan Jaber-i tsükdaktsü. Kasa mapang nung Hokolbarnü semifinal asayaba mapang India nung asayarsa Dinesh Naorem-i Arsenba tsükdakja liasü.

GAMMA Asian MMA Championship nung India team-i medal 22 akokba sülen parnok tasembuba jenjang nung tembangogo. India team-i gold pezü, silver tenet aser bronze medal 11 kokteta liasü. Iba asayamung nung Kazakhstan-i medal 36 ngua temaba jenjang nung tembang aser Kyrgyzstan-i medal 22 angu. Maneni Palestine-ia medal asem aser Pakistan-i medal asem ngua liasü.

Tokyo Paralympics: Bhavina & Nishad nati silver aser Vinod-i bronze medal angu

Luroi/August 29, 2021 (Agencies): India tsürtem rongnungi table tennis asayar Bhavinaben Patel-i Paralympic Games nung silver medal ngua otsü tasen ka yangluogo. Paralympic nung mezüngbuba asayaba mapang lai iba takok ngutetogo. Deobarnü tetsür kija final asaya nung la China tsür Ying Zhou 0-3 agi koka liasü.

Arishi küm 34 tain asayari asayamung tepeyong kanga junga asayaba sülen final nung 7-11 5-11 6-11 agi Zhou-i la tsükdaktsü, shibai gold medal anaben tashi koker lir.

Hopta tetenzükdang group stage asayaba mapang Zhou-isa Patel koker liasü.

Paralympic nung medal pongu tashi ngur aliba asayar den final asaya nung Patel-i la tasa shidak benoka masayateti liasü.

Patel, shiba ita 12 asüdüng polio tashidak agi menepa liasü, lai Honibarnü semifinal asaya nung 7-11 11-7 11-4 9-11 11-8 agi China tsür world no 3 asayar Miao Zhang tsükdaktsü.

Hokolbarnü quarterfinal nung lai 2016 Rio Paralympics gold medallist aser world number two asayar Serbia tsür

Borislava Peric Rankovic koka medal kabosa angutsü jangjar liasü.

Kasa mapang nung Deobarnüsa tebur high jump T47 asaya nung India nung asayar Nishad Kumar-i silver medal nguogo. Paisa, iba asaya nung Asian record yanglua liasü.

Kumar-i 2.06m alemteta silver medal angu aser Asian record tasen ka yanglu. Iba asaya nung America nung asayar Dallas Wise nema silver medal agütsü, kechiyong Kumar tenapronglai 2.06m alemteta liasü.

Kasa mapang nung America nungersa Roderick Townsend-i 2.15m alemteta gold medal anguba den world record tasen ka yangluogo.

Maneni Vinod Kumar-i tebur discus throw F52 event nung bronze medal ka nguogo aser pai Asian record tasen ka yangluogo.

Vinod Kumar ya arishi küm 30 sülenang asaya tenzüker aser pai tang arishi küm 42buba nung Paralympics medal ka koktetogo.

Pai discus throw final nung discus 19.81m merepteta bronze medal ngua liasü.

Sports Minister-i Fit India Mobile App amenoktsüogo



Luroi/August 29, 2021 (Agencies): Fit India Movement tenüker kümnabuba nung Sports Minister Anurag Thakur-i Deobarnü Fit India mobile app amenoktsüogo. Iba app ya trainer-cum-fitness guide ka lir.

Thakur-i, iba app ya National Sports Day nü India nungertem atema sorkar sempet lir, ta ashi. National Sports Day ya nungtugu hockey asayar Major Dhyan Chand asoba anogo nungtem nung amunger.

"Fit India app ya Major Dhyan Chand nem aküm tetushi agütsüba ka lir, shiba linük nung asayatem atema nukrangtong lir," ta Major Dhyan Chand National Stadium nung sentong

ka ayongzüka agiba mapang Thakur-i ashi.

Iba sentong nung Tokyo Olympics nung bronze medal ngur aliba hockey team captain Manpreet Singh-ia virtually shilem agia liasü.

"Temang anema alitsü atema asayatem ajak atema iba app ya tenügdaktsü aser iba app sülen anidaktsü imlar. Iba app ya India nung lanurtem anema toktsütsü atema lir, kechiyong anema aliba lanurtemi India temaba jenjangi ajungkettsü," ta pai ashi.

"Asenoki fitness ya kanga tongibangsa magir. Asenoki fitness atema anogo nung ghonda tesadang ka dang mapang intoktsü nungdaker. Iba

app ya jangrademtsüka aser angati dang aser ajaki mashi tesem ka nung parnok indang fitness asadantetsü aser tendangtetsü," ta paisa ashi.

Hockey captain Manpreet-ia iba app amshitsü ayongzüko.

"Iba app ajanga teyari tulu agütsütsü aser amshitsüa kanga temela. Nibo amshi tenzüko aser iba ajanga kü fitness tali tajungba kümdaktsütsü imlar," ta pai ashi.

Iba sentong nung Minister of State for Sports Nisith Pramanik, Sports Secretary Ravi Mittal, Sports Authority of India Director General Sandeep Pradhan aser tanga ketdangsurtemi shilem agia liasü.

Asian Junior Boxing Championships nung Rohit Chamoli-i gold medal nguogo



Luroi/August 29, 2021 (Agencies): Deobarnü Dubai nung Asian Junior Boxing Championships final nung National champion Rohit Chamoli (48kg)-i Mongolia nung asayar Otgonbayar Tuvshinzaya koka gold medal nguogo.

Mezüngbuba round makokba sülen Chamoli-i tanungba round asem koka 3-2 agi asaya akok.

Iba asayamung nung India team-i junior asaya nung bronze medal trokbo kokatokogo. Tetsür asaya semifinal nung tamakok anguba sülen Devika Ghorpade (50kg), Aarzo (54kg) aser Supriya Rawat (66kg) nungeri bonze medal angu aser tebur asaya nunga Ashish (54kg), Anshul (57kg) aser Ankush (66kg) nungeri bronze medal nguogo.

2019 küm Fujairah, UAE nung Asian Junior Championships asayaba

mapang India team-i medal 21 (gold trok, silver teku aser bronze trok) ngua tasembuba jenjang nung tembanga liasü.

Junior jenjang nung gold medal angurtem nem senpet USD 4,000 agütsütsü aser silver aser bronze medal angurtem nem USD 2,000 aser 1,000 agütsütsü.

Hombarnü youth event nung India nung boxer 15 gold medal atema asayatsü.

Final asayatsüpur rongnung tetsürtem rongnungi Nivedita (48kg), Tamanna (50kg), Simran (52kg), Neha (54kg), Preeti (57kg), Preeti Dahiya (60kg), Khushi (63kg), Sneha (66kg), Khushi (75kg), Tanishbir (81kg) densema lir.

Maneni teburtem rongnungi Vishvanath Suresh (48kg), Bishwamitra Chongtham (51kg), Jaydeep Rawat (71kg), Vanshaj (64kg) aser Vishal (80kg) nung final asayatsü.

BILEMDANGANG

"Kati ka dak metaloker alitsüji ajak dang tajungtiba."